

本朝分省人物考

人物考卷之二十七目錄

南直隸常州府

吳雲

陳洽

錢本中

謝應芳

王達

王忠

陸祥

倪瓚

胡澐

儲福

吳潤

徐晞

王紱

段民

嚴本

陳濟

楊璿

陸愷

沈琮

盛顛

王俱

徐溥

殷貴

宋瑛

白昂

秦夔

沈暉

陸簡

華山

白玠

王沂

張愷

邵寶

白圻

吳儼

華津

薛格

本朝京省人物考卷之二十七

南直隸常州府

吳雲

吳雲字友雲常州宜興縣人雲少有文行爲國子生同輩皆推重之仕元爲翰林待制入國朝洪武元年太祖高皇帝遣魏國公徐達北定元都魏國以禮敦遣赴京是年九月除弘文館校書郎二年改陝西渭南縣丞四年召還擢刑部郎中尋遷磨勘司令五年拜刑部尚書六年出爲湖廣行中書省叅知政事八年坐事被逮至上重其才卽釋之時以元梁王

據雲南尚未下特命往使諭之且曰卿能爲朕作陸賈乎雲對曰天命所在誰敢違之第恃地遠故阻聲教臣奉 陛下威德往告以大義諭以禍福彼必附順若冥頑不從興師未晚 上然之遂遣行會梁王使其臣鐵知院等二十餘人使漠北爲大軍所獲械送京師 上欲以恩懷之令與雲偕行至雲南之沙塘口鐵知院等謀曰吾屬奉使不達中道被執而還罪必不免於是說雲改易制書共給梁王不從欲殺之適梁王亦遣人來劫降逼令胡服辮髮往見雲曰朝廷念雲南一方生靈不忍加兵特遣使持 勅招

降汝輩今反欲脅使臣以降邪吾以死自誓終不爲
汝屈遂被害旣而梁王壯其節命收其骸骨送蜀給
孤寺藏之後雲南竟入版圖朝廷始知其死官其子
黻爲國子生黻貧不能還鄉以雲嘗仕湖廣卽葬江
夏縣金口鎮歲久遂占籍江夏有四子弘治中雲南
巡撫王詔請於 朝謚忠節嘉靖元年御史唐符奏
乞表其墓 詔有司修其墓歲時致祭

陳洽

陳洽字叔遠武進縣人貌奇偉長身玉立與兄濟暨
弟浚同游鄉先生謝子蘭之門子蘭謂人曰陳氏兄

氣如此河東之薛不得專美於前矣洽讀書力
學淹貫羣籍尤工於書法弱冠用薦舉擢給事中命
車卒過目輒識其面且記姓名弗忘有再至輒笞
之總戎懼請罪洽上其事 上嘉之賜織金鸚鵡衣
一襲後又奏凡大臣犯重罪雖蒙恩宥不宜仍列本
班必少加降抑以示勸懲 上從之詔叙列八品九
品後洪武丙子父以貞戍五開以歿洽去官至家時
五開蠻寇竊發匍匐將往以歸父喪或止之不應涕
泣以行觸瘴冒險問關五千餘里竟負骨歸葬焉未
幾兵部尚書茹瑄薦其才可大用遂奪情起復授文

選司郎中壬午年 成祖入正大統首陞爲吏部右
侍郎量才陞官銓衡惟允復署地官事益有聲永樂
三年乙酉遷大理卿持法平恕民無告寃者丙戌交
趾黎賊構逆 朝廷興師問罪命覘賊蹤跡調土兵
三萬以佐總戎五年黎賊就俘交趾遂平改吏部左
侍郎除交趾流官旣還朝命掌春官事論功定賞人
無間言繼署冬官名譽尤振歲乙丑交趾餘寇簡定
作亂仍命英國公張輔率師討之洽實叅贊機務遂
擒其兇渠簡定而還時北寇猖獗 車駕親征承命
偕英國公輔訓練士卒於塞外辛卯復往鎮交趾以

慈和綏輯其民先教化而後刑法夷人安之蠻俗爲
之不變絃誦之聲相聞乙未還京以功陞兵部尚書
十五年再命出鎮交趾兼掌布按二司事 仁宗卽
位勅領交趾布政按察兩司仍叅軍事 宣宗改元
之初蠻寇黎利勢益張成山侯王通率師討叛仍與
叅贊是歲冬出師討賊洽以爲宜駐師石室縣之沙
河以覘賊勢通欲渡河而陣又反覆諭以利害且陳
方略通弗聽翊旦五鼓麾兵以渡洽弗能止次寧橋
賊自巳至未力戰洽遂自奮馬突入賊陣欲擒其首
惡身被創甚而了無怖色旣而墜馬左右扶掖欲還

營中且曰主帥且退公何自苦如此洽張目叱之曰
吾受 朝廷厚恩四十年報國正在今日吾豈偷生
忍耻者乎衆皆潰散洽奮勇持戈進手殺數人知力
不能支自刎而死賊相視駭歎洽恂恂謙謹清儉寡
欲孝友出於天性動止語默皆有禮度惡諂諛尚正
直於人無所毀譽而遇之必以誠不事侈靡不畜媵
妾所至惟家僮二人以給使令晚年不喜飲酒閒居
沉默終日危坐人莫窺其底蘊博涉書史論至古將
相忠義之事必正顏定色英氣橫發擊節稱嘆若已
有之雖有邊徼經營軍旅之務稍暇卽讀書自娛手

未嘗釋卷其爲詩文敏捷往往皆有思致卒之明年
通棄城而歸交趾遂爲賊所據卒之日年五十有七
贈少保謚節愍

錢本中

錢本中武進人讀書習法律洪武中以人才舉歷知
故城元城縣有聲改知吉水豪民宿吏素爲民患苦
者捕其魁徙遠方邑中肅然新壇壝學舍召諸生躬
教之旌別勸率政務清簡不任刑威有盜聚山谷間
時出掠郡守欲以兵殲之本中單騎詣賊壘諭以禍
福咸相率縛首賊自歸會赦免本中勵清操門無私

謁妻子布衣蔬食裁足朝夕以註誤罷官父老奔走
號泣留不獲郡人學士胡廣力保之得復官民間本
中且復來空間并迎拜如見父母未幾以疾卒民哀
慕留葬吉水爭爲負土營墓云

謝應芳

謝應芳武進人自幼篤志留心性理之學尤工於詩
文元末避地吳中 本朝平定始還毘陵年九十七
終所著有思賢錄辯惑編毘陵續志龜巢藁

王達

王達字達善無錫人世編氓至達始業儒家素貧嗜

學不倦聰敏博聞考索精到爲文辭援筆立就不喜浮靡惟務篤實事親能盡子道閭里則之嘗受經於鄉先生張籌甚見器重後籌拜禮部尚書復往卒業京師學士宋濂見達端重簡默而丰儀卓偉嘆異其才折輩行以相交及歸而縣令辟爲鄉校師達訓迪有方學者多所造就改除大同府學訓導教如鄉校時革除年間以薦入爲國子助教六館諸生多趨其門朝夕請益達誘掖開誨講說論議終日不懈成德達材之士彬彬然出達門下初成祖居燕藩聞達名及卽位召與語稱旨太子少師姚廣孝復薦之

遂入翰林爲編修時方治革除年間奸惡 上間問
建文君過失達對曰可與爲善但輔導非人故誤之
耳 上不以爲忤與修 高皇帝實錄尋陞侍讀學
士編纂永樂大典爲總裁兩知貢舉得士尤多嘗獻
視學頌達謙和恭慎爲文章有典則援引證據必本
於六藝作詩有唐人風韻晚號耐軒又號天游道者
有耐軒集詩書心法易經選注尚友編桂林機要詩
小序及梅花百咏詩藏於家達性不飲酒甘嗜薄味
然常患氣疾時遇寒暑輒發及臥病篤 上命醫往
視永樂五年卒年六十五 命有司歸其喪

王忠

王忠武進人洪武中父諒以輸稅後期法當死忠時年十七自詣京請代父死上并赦之宣德初以薦除兵部主事練於世務方以大任期之忠以母老懇乞致仕卒於家

陸祥

陸祥無錫縣人初以石工隸工部鄭王之國選授工副後有薦其有異技者召改工部管繕所丞管作稱吉祥有老母病或以上聞命光祿日給酒饌并鈔五錠以爲養擢工部主事進郎中以至侍郎祥巧思

天授嘗用石方寸許刻鏤爲方池以獻凡水中所有魚龍荇藻之類皆備曲盡其巧然爲人頗謹愿士夫不以其出自雜流而棄之子華以譚夷字遙館閣歷官光祿寺署正成化五年十二月卒

倪瓚

倪瓚字元鎮號雲林無錫人生而俊爽稍長強學好修性雅潔敦行孝弟而克恭於兄相之樹立率子弟以田廬生產悉有程度有餘財未嘗資以爲俚俗紛華事其師輩昌王仁輔老而無嗣奉養以終其身歿爲制服執喪而葬焉神情朗朗如秋月之瑩談辯絕

人聲疊不倦好客之名聞於四方名傳碩師方外大
老咸知愛重所居有閣名清閟幽迥絕塵中有書數
千卷悉手所較定經史諸子釋老岐黃紀勝之書盡
日成誦古鼎彝名琴陳列左右松桂竹栢梧菊之屬
敷紆繚繞而其外則高木修篁蔚然深秀故自號雲
林每雨止風收杖屨自隨逍遙容與詠歌以娛望之
者識其爲世外人客至輒笑語留連竟夕乃已平生
無他好惟嗜蓄古法書名畫持以售者歸其直累百
金無所靳雅趣吟興每發揮於縑素間蒼勁妍潤尤
得清致奉幣贄求之者無虛日晚益務恬退棄散無

所積屏慮釋累黃冠野服浮游湖山間以遂肥遯
采愈高足跡不涉貴人之門與世浮沈耻於銜暴清
而不汗將依隱焉志氣寂靜往來城市混迹編氓介
特之操皦然不渝年既老而耳益聰目益明飲啖步
履不異壯時氣貌充然其所養可知矣所著文稿句
曲張天雨錢塘俞和愛之爲書成帙藏於家洪武甲
寅以疾卒享年七十有四

胡澣

胡澣字源潔武進人生而髮白彌月乃黑見者異之
自幼端重不好嬉戲弱冠入邑庠登建文庚辰進士

第授兵科給事中勤謹識大體士林譽之 成祖入
正統供職如舊永樂改元秋以奏稱 旨陞戶科都
給事中丁亥代署祭酒事 上察近侍中惟濙忠實
可托遂 命巡遊天下以訪異人爲名實察人心向
背時 御製性理大全爲善陰騭孝順事實書成俾
以此勸勵天下以故雖窮鄉下邑軌跡無不到在湖
湘間最久丙申秋還朝丁內艱乞終制不允數日特
陞禮部侍郎明年往巡江浙諸州授嘉議大夫癸卯
復自均襄還朝 車駕親征北虜駐驛宣府馳謁行
在初 上臥不出聞濙至喜而起且慰勞之曰卿驅

馳良苦 賜坐與語凡所歷山川道里郡邑豐嗇民情休戚以至所聞所見保國安民之事悉爲陳說上欣然納之向所疑慮者至是皆釋比退漏下四鼓因進太嶽太和山瑞光圖及榔梅靈芝先是 仁宗爲太子監國時飛語上聞 文廟屬往察之比至以所見七事皆誠敬孝謹密疏以聞 上覽之大悅自是不復疑 仁宗嗣位特賜誥命授正議大夫資治尹已而聞曾有密疏疑之乃轉太子賓客兼國子祭酒官南京未幾閱章奏見所上密疏深嘉其忠方議重用之而龍馭上賓矣 宣宗卽位復禮部左侍郎

兼管如故隨進禮部尚書是歲秋漢庶人謀叛事覺
贛 上親征事平受賞賚甚厚復給叛者家丁四人
丁未 賜誥命授資善大夫復賜近地一區於長安
右門外給闈者二人戊申 上嘉其忠勤特 賜銀
章四尋以浚生辰 賜宴於其第秋八月扈從巡邊
至會州而還己酉命兼詹事府事辛亥命兼行在戶
部事 聖節御製詩一章 賜浚及蹇義楊士奇楊
榮因賜宴盡醉而罷新建禮部成命光祿設宴勳戚
公卿皆往賀以爲盛事立石廳事之右八年命同楊
士奇等遊西苑倚任益隆每宴見 上虚心問曰卿

有何言得其章奏卽施行之 英宗踐祚惟圖任舊
人待之尤厚凡軍國重務皆與聞加授資德大夫正
治上卿每考績必有賚予甲子以年至七十乞致仕
上以其精力未衰慰勉留之已巳 上親征北虜

命留守京師會 車駕北狩 郕王嗣位進太子太
傅景泰元年淡手一揭文武重臣羣立傳觀吏部尚
書王直曰此禮失而求之野耳給事中葉盛等因起
就觀語多文而切直首備 登極 詔旨以爲由此
而觀 上皇之出非游畋無益爲 宗社計耳今都
人一聞 駕旋無不喜躍則人心尚未厭 上皇也

今日奉迎禮當從厚 主上當避位懇辭而後受

命乃可不然恐千載史書難洗末有書上修史先生
等語而逸其名甚驚異之淡言此得之高學士衆因
告之曰連日迎復 上意屢以虜情多詐爲疑此所
言若封進見朝野同情或可感動 上心于是葉盛
等草疏同上且破匿名之說俄頃得 旨繳進 英
廟將旋淡屢奏迎復事 上每以虜情多詐爲言將

抵居庸始得 旨議迎復儀注并議防變方略輿情
欣慰當多官會議時都御史王文忽厲聲沮抑聞者
相顧莫敢言而退給事中葉盛等憤鬱不平造禮部

問焉澹從容言儀注已送內閣矣王一人言豈可憑抑何足與辯衆服其老成定見而其量亦不可及云辛未春因災異數見乞放免不許尋進少傅時議立見濟爲東宮下禮部會議都御史王文首言當立大學士陳循等皆唯唯澹不能爭而見濟竟立時給事中林聰首言皇太子無過不肯署名王文怒目叱之文致其罪以專揅選法當死大臣當連名署奏牘次及澹驚曰林聰至死耶如公論何卽移疾不出朝廷遣問之澹曰本無疾聞林聰被害心怖不安景帝始知聰爲人所誣竟坐未減迨英宗復辟澹

扶疾入朝乞謝事且辭師傅二職 上憫其老從之

陛辭賜白金寶鏹給驛舟以歸歸之日鄉人老穉聚觀者以億萬計乃陳所受賜於堂感激泣下時弟克恭克寧克誠年皆七十餘蒼頭白髮聚樂一堂遂扁曰壽愷復優游桑梓者七年疾復作召諸子前曰爾輩圖報國恩勿墜家聲遂瞑目而逝年八十有九訃聞贈太保謚忠安遣官祭葬如制浚爲人平易寬和廉靜寡慾自奉澹薄起居有常居官敬慎一毫不苟歷事 四聖立朝幾六十年薦拔士類甚多十知春闈貢舉之士盡出其門平居未嘗疾言遽色雖庸

夫孺子亦知其爲長者所著有芝軒集若干卷又嘗輯錄醫藥經驗者曰衛生易簡方經進又有律身規鑑俱行於世

儲福

儲福無錫人建文末挈母妻以逃 文皇卽位 詔戍卒入伍至燕山福在錄中乃調雲南曲靖衛福仰天哭曰吾雖一介賤卒義不爲叛逆之臣在舟中日夜泣不止竟不食而死母韓氏妻范氏爲營地葬福范有姿色年尚幼奉姑甚謹每哭其夫則走山谷中大號不欲使姑聞里有聞其色欲委禽者問知其事

則曰此節孝婦安可犯一日往澗邊浣衣見水邊有草類蘇蓆因取以織蓆售以養姑姑至七十餘終范亦八十外乃卒卒後蓆草不復生土人義之卽其居葺爲菴集尼居之名崇孝菴焉

吳潤

吳潤字汝德武進縣人補縣學生永樂初以楷書與修永樂大典授刑部主事歷建昌姚安廣信三府知府陞雲南按察使土官普覺謀變潤先事誅之事聞陞江西右布政使丁外艱解任江西民上章請奪情詔起復左布政使景泰初以孫選儀賓例致仕家居

十餘年天順八年十二月卒年七十九潤寬厚長者處已待物一以誠信在江西十有二年民愛如父母至今江西人論方伯必以潤爲首稱云

徐晞

徐晞字孟晞江陰縣人永樂初由吏入仕時營建北京宮殿命勛貴重臣總之授晞都事功成陞營繕主事宣德中陞郎中尋調兵部武庫司英宗卽位陞試兵部右侍郎往陝西臨洮鞏昌選練軍士旣而虜寇讐殺擾邊命晞叅贊甘肅軍務正統丙辰召還實授侍郎復命往守莊浪涼州晞奏言其地戍士多衣

冠故族請建學立師以作養之尋轉南京戶部左侍郎歲辛酉征麓川命晞督餽餉賊謀間道焚掠餽糧晞訓勵土官出兵擊破之餽道以通麓川平進兵部尚書乙丑以疾乞致仕卒 上遣官祭葬初晞始爲

郡小吏時有富室謀併其鄉人田產誣以人命不勝拷掠自引服晞心憐之密導其家訴於憲司而下文於郡晞核實爲言其寃於官而釋之歲久晞跨驢詣常熟中途遇其人邀之至家與妻泣拜設雞黍以待適舉杯而其人逸問其故妻泣曰吾夫感公活命之仁家貧無以報今夕邂逅願以鄙陋之姿侍寢吾夫

已假宿鄰家矣晞大驚曰是何言也鬼神昭列使徐
晞爲是耶速覓而夫來則留否則雖夜必去矣婦乃
呼其夫還晞諭慰再三達曙告去夫婦爲之感泣

王 紱

王紱字孟端無錫人自少志氣高逸讀書工古歌詩
嘗北遊江淮浮黃河踰太行出鴈門往來晉代之間
周覽形勝輒感慨弔古徘徊不能去一時聞人慕其
名爭延致之及觀其氣貌瓌岸議論踔勵益加器重
久之不樂歸江南隱居九龍山中詠左太冲詩曰何
必絲與竹山林有清音若將有終焉之志自號曰九

龍山人永樂中有以能書薦者入翰林擢爲中書舍人與沈度輩頡頏後先以山澤之臞一旦蒙上恩拔廁身侍從亦可謂隆遇矣紱尤工畫山水竹石每酒酣對賓客著黃冠服意氣傲然伸紙攘袂揮筆灑灑奇怪跌宕不可名狀畫已徐吟五字詩蕭然有風人之致然不可意者雖豪貴不肯與就之至閉門不納人問之曰丈夫在所處輕者苟且如此重者將何以哉士益以此高之平居急友好賓客不計家有無然是是非非絕不隨俗俯仰雖見嫉莫顧丙申春臥病北京寓舍語所知者曰生死如夜旦所貴此心不

昧耳奄然而逝年五十有五

段民

段民字時舉武進縣人登永樂甲申進士爲翰林庶
吉士時 太宗皇帝命禮部翰林院准天經之數選
曾棨等二十八人就文淵閣盡出中秘書使盡其業
且暮給大官饌又月給膏火之資蓋期之於大用而
民與焉民祇體 上意益勵弗懈而文學大進與修
永樂大典丁內艱去服闋除刑部主事涖官廉慎而
明敏處疑獄必歸於厚踰年扈從赴北京召修四書
五經及性理大全書成被 重賜復還刑部陞郎中

益精獄議尤爲尚書所重凡大獄及部奏章必屬閱
乃上在刑部八年山東妖婦唐賽兒作亂三司官以
縱寇誅 召廷臣簡代者共推舉數人授民山東布
政司叅政同舉有畏難者民曰竭力以共吾職耳何
足計利害哉下車數載宣德意飭紀綱撫殘餒剗革
宿弊政理一新吏民悅戴居三年召同考禮部會試
人服其衡鑑又三年 召赴闕命以本官署戶部右
侍郎之南京是時 車駕在北京久南京諸司習於
翫愒任錢穀刑名者其務叢脞尤號不治至則躬勤
率之莫敢或違始若扞格已而服從咸修其職明年

實授本部右侍郎又明年改刑部其振起作新一如
戶部罪人聞民至皆相慶於獄伸抑疏滯浹旬之間
聲譽用彰三年以績最 賜誥授嘉議大夫得寒疾
數日小差矣將出視事左右謂未可以風曰數百人
困坐獄中翹跂待我柰何可自佚哉強出疾復作遂
亟有問之者答曰不能報 上恩矣如老母何言已
卒

嚴本

嚴本字志道號蒿菴江陰人永樂癸巳何澄薦以職
堪風憲徵至南京 仁宗在青宮監國事命吏部尚

書疑公義試理人策一篇復舉律疑數條爲問隨問
敷答同試者皆授郡邑職獨拜刑部主事時掌部侍
郎張公本介潔自持鮮有當意疑獄多俾訊之安慶
鄉民七人夜漁于河竊民舟米軍衛邀功抵以強劫
重辟一訊知其寃改以杖徒政多類是辛丑詔與尚
書宋公禮伐木于西蜀烏蒙蠻強獷難化一夕驚疑
被甲負弩羣至衆皆懾懼獨挺身諭以朝廷威德蠻
遂帖服 仁廟嗣統徵還大理卿虞公謙刑部尚書
金公純同日論薦卽授大理寺左寺正時法曹斷獄
多以知情故縱及大不敬爲擬特爭之曰我朝定律

除逆叛數條外餘無故縱之文况不敬情罪輕重弗
一庸可槩人重比以失聖朝明慎庶獄意平虞公黷
之悉爲駁正迄今遵守駁歷旣深清介孚于遠近有
告儀真簿與吏盜官麻萬斤已誣服察其寃覆勘麻
數不虧特昭雪之徽州民有室女無夫而娠舅氏詰
責之女懼解衣水際而逸女之母訴弟逼女溺死杖
徒駁以屍未獲令檢尋後于鄰邑得其女蓋與人私
通以逃始正其罪追還徒者有御史陳旭子與鄉人
同飲于肆俱爲邏者所獲蓋鄉人前爲盜事覺而逃
餘黨七人已棄市鄉人旣就繫懼拷誣引御史子同

盜且分之賊案具而鄉人死御史子無以自明謬以
其母簪珥爲贓及閱案見前七人招服未嘗有御史
子及召事主驗所入贓非其物疑而問之其子號痛
稱冤將直之同列皆謂成獄久不可改本曰御史子
有冤而不得白執法者能無慙乎乃獨署其案聞于
朝而釋之其在大理時良鄉民有失馬疑其隣盜之
執告于縣縣亦以爲可疑因拷訊過重而死法司坐
丞決罰不如法當徒而又坐告者以絞本曰因公殺
人罪丞當矣告者因疑而訴豈可坐以誣告致死哉
所擬則似丞與告者各殺一人矣遂駁正而活告者

之死有某衛指揮蓄交吐蠻童既長爲娶目爲養子
後指揮戲其婦不從事覺法司罪以強姦子婦本駁
之曰養子非所生而姦且未成比于內亂有間矣覆
議得減死從流莒州有屯卒奪民田爲其所訟得罪
于按察司卒讐之而無以逞夜盜民家驢以歸民搜
索得之卒反以民爲誣擒送千戶孫恭所千戶與卒
爲親民被禁勘至司死法司坐千戶以徒本曰殺以
止殺千戶得生則死者啣冤遂正其故勘之罪山東
人皆快之蘇州衛卒十餘人駕舟運餉泊河西務夜
劫客舟中一人爲其主所殺餘黨惡事覺無以自飾

見隣舟有押解人帶兵仗防囚而行者因謬指押解人劫商財謂其侶往救而被殺擒告于官皆誣服覽其牘疑之曰押解人與囚同舟借使爲盜囚必知之駁令驗問果得其實遂釋押解人而正盜之罪其矜情原法者多是類也一時咸比於于公之不寃以致仕歸卒于家年七十有八

陳濟

陳濟字伯載武進縣人穎悟異常總角讀書過目輒成誦勵志弗懈日夜博記廣覽聞人有異書輒假手錄成帙至於胼指無憚勞勤如是者十餘年遂貫穿

經史百家之言才名卓然振起會修永樂大典以大
臣薦召至爲都總裁時合內外詞臣暨太學儒生衆
數千人繙閱中秘四庫書浩瀚填委至則與故少師
姚公尚書鄭公祭酒學士數輩詳定凡例區別去取
莫弗允愜而六館執筆之士凡有疑難輒從質問隨
問響答未嘗舐滯疏抉剖析咸有源委非口耳涉獵
者可比故一時之人無不服其該博書成擢右春坊
右贊善居輔導之職十有五年小心謹慎未嘗有分
毫過差被命隨侍五皇孫授經凡有諮問濟援据精
詳洞究始末博而有要皇孫深加禮重方將資以啟

沃甲辰夏暴中風不能言卒於寓舍年六十一生平
重厚修謹孝友天至事母備極色養母嘗戒以無過
飲終身未嘗至醉其宦遊京師也以母年高不可迎
養每一念至輒欷歔飲泣教篤二弟底於成立爲文
章根據經史必務理勝不事葩藻常曰文如菽粟布
帛貴有益於世不爾雖工奚益所著有綱目集覽證
誤若干卷文集若干卷藏于家

楊璿

楊璿字叔璣無錫縣人正統己未進士授戶部主事
遷郎中山西右叅政陝西右布政使河南左布政使

母喪服闋進戶部右侍郎尋改右副都御史撫治荆襄流民巡北直隸節制永平山海等邊關巡撫河南卒于官賜葬璿通敏有操執與人不苟合家素豐裕而自奉甚儉約治官如治家惟其是不擇利害爲趨舍其在山西定民差役在荆襄區處流民在京畿賑濟饑民事皆得宜而無弊旣沒逾十年士夫談者猶嗟悼云

陸愷

陸愷字元之武進人正統乙丑進士選授北部愷以母在堂乞改南以便迎養乃得南京吏部主事曹務

簡而日多暇日事披覽學乃益進尋改戶部監督在
京草場累年宿弊一朝盡革陞員外郎中所司者土
田錢穀愷清以律已勤以蒞事大爲諸長老所器重
歲乙酉子簡發解京闈明年進士第三人擢編修弟
愉亦成進士弟怡復薦鄉舉愷幡然起曰物忌盛滿
吾可以休矣累疏乞歸歸則日與鄉之耆彥飲宴歌
咏以樂太平凡官政得失私家短長一切弗聞卽聞
亦絕不形於言議也時母尚無恙昕夕奉養備至歲
節及誕日率子侄稱觴上壽人以爲榮曰毘陵雖多
致政者而慈闈康壽則所僅見也年六十有二卒於

家

沈琮

沈琮字廷器武進人自少輒能耽嗜書史既長從布政謝公輔學易每有新得正統甲子中鄉試又四年戊辰登進士授監察御史景泰庚午奉勅督理浙江銀鑛區畫有法浙之人至今猶才之既奉勅清理京畿及中州齊魯等處馬政推誠教戒所至不擾而牧馬日蕃後理湖湘刑獄尤多平反比還巡按兩廣威望益振乙亥居父喪天順改元起服陞四川按察僉事時蜀地多盜多方捕獲人始安業朝廷屢賜文綺

以旌其能松潘羌夷自成化初嘯聚為患僉議琮在蜀年久為彼所重宜陞本司副使以鎮其地乃受璽書以往與都督協心殫力修城練卒不數月間遂平黑虎等寨事聞降勅褒嘉亦有文綺之賜乙未堅乞致仕歸後數年朝廷以言者追錄前功命陞一級家居日惟故舊賓客相與遊樂若朱叅議貞施待詔靖皆同社也未幾諸公次第亡去惟琮康強不衰至八十有四而卒

盛 顥

盛顥字時望無錫縣人景泰辛未登進士第首擢河

南道監察御史尋以老成掌道事時初經已巳之變
朝廷懲前政委靡之失稍開言路一時言事者毛
舉細故攻訐陰私以張直聲顛獨顧大體惜人才掩
其疵疾不爲已甚善類賴之嘗兩奉命出按淮揚時
值歲歉發倉賑貧全活者甚衆按閩時適當大比拔
賢振滯是科得人爲盛 英廟復辟之初權臣之冒
功者朋比爲奸鑿空起邊釁欲樹奇功以蓋其跡率
師闖塞卽還虜因乘之而入諸御史欲有言同事有
洩之者先愬於 上誣御史中有與被繫內臣張永
同族者欲爲之報復以激 上怒卽逮所誣御史下

獄明日章始上 上御便殿召衆入盛氣待之擲章
付御史誦之至半 上曰止摘章中所條事折之令
其分疏復諭之以終誦 上意稍悟然重違權臣意
姑從輕典凡列名者俱調外任顓時掌河南道事出
知保定之束鹿縣先是權臣啟邊釁其勢焰可畏人
無敢言者顓首與同官漆水張鵬謀謂事干軍國某
等官臺憲烏可畏禍不言張以爲然卽入謀之兵科
給事王茲約以章上及召入永平周賓倉卒誦所上
章音吐洪亮略無阻滯及對 上之言辭直理正天
下聞而壯之而不知首啟其謀者顓也其知束鹿邑

多顯宦往往怙勢爲不法聞顯至相戒曰是嘗劾奏石總兵者其人不可犯也顯變搏擊以爲撫循吏畏而民安之未幾丁內艱去民留之不可俟其服闋相率詣闕乞顯顯得再任有爭訟者諭之以理輒叩首聽受不復辯鄰邑聞之訟多年未決者各來請判於顯顯折以片言各心服而去時有清如水明如鏡之謠邑界真保開四境之民間風趨赴郊外有荒地聚以成市邑人因日以清官店旣去任民築亭爲立去思碑歲甲申擢守邵武行所無事不動聲色而郡大化旣而巡撫都憲以延平民役而事繁請於朝移

治之延平與邵接境聞其政聲有素莫不革心向化
癸巳陞廣西叅政專督糧餉丙申陞雲南右布政使
丁外艱巳亥服闋改陝西尋陞左時廣西殘破之餘
委曲措注民夷賴以不擾陝西地臨三邊邊報無虛
月適歲多歉顛調度有方而餽餉不缺壬寅入爲刑
部右侍郎佐其長以明刑恒舉歐陽公求生不得則
死無憾之語爲僚屬告有深文巧詆者輒不樂之刑
用是平僅再閱月調南京或以爲言顛曰吾南人官
於南固其所也癸卯山東旱饑盜賊將乘之而起
廷議遣大臣巡撫僉曰無如盛時望者改都察院左

副都御史乘驛往命至卽日就道甫下車禱於天雨
卽大注枯槁復甦顛多方設法凡前人救荒之政於
今有益者次第修舉而又因時之宜條數十策行下
所司民賴以濟賑卹之餘所儲尚百餘萬以及於前
代聖賢有功於齊魯者爲之建祠宇以報祀之其山
東之政大抵以黜貪暴表忠良除苛政固民人爲本
三年齊俗翕然以變顛年近七十以老疾上章乞致
仕 賜馳驛歸至徐州適所部有大獄以顛知其始
終有 旨命鞫之獄成後歸自家食時家事一以付
其弟頤至是抵家伯仲怡怡友愛加篤於家事一不

問願爲之構方塘書院疊山鑿池蒔花植種以爲娛
老之地靜坐一室焚香讀書以自適泊如也歲丁未
以上 皇太后徽號恩進一階家居者六閱寒暑卒
年七十有五

王 與

王與字廷貴武進人與十歲能爲詩景泰辛未 賜
進士第三人授翰林編修被 旨偕諸庶吉士讀中
秘書給酒饌筆札諸物癸酉旱代祀東嶽雨輒降有
讓嶽神并代嶽神答詩甲戌以父憂去天順丁丑仍
舊職庚辰同考禮部充 太子講讀官辛巳預修

大明一統志成有白金綵幣之賜癸未再考禮部得人尤多秩滿遷侍講甲申 憲宗登極錄侍從勞擢左春坊左庶子仍兼侍講時始開經筵勅充講官復賜金幣又勅修 英宗實錄分掌禮館纂述詳慎得史臣體念母老求便養改南京翰林學士迎養於官丁亥實錄成復以舊勞賜金幣戊子以母喪去辛卯服闋陞南京國子監祭酒時教法久弛乃嚴立程制核勤惰爲懲勸諸司差遣一按名籍不爲私假又條奏便宜數事傾風采凝峻廉角峭厲故教法修整羣士皆歛衽欽服凜然稱嚴師焉壬寅秩再滿擢南京

吏部右侍郎吏弊滋甚凡差撥則庭闕不可制乃酌
爲定規弊始息丁未召爲戶部左侍郎弘治初遷南
京戶部尚書尋改吏部考諸司官屬諏訪去取務合
輿論又上疏陳八事多見采納癸丑年七十屢疏請
致仕甫得溫旨而疾已篤以乙卯五月卒年七十有
二贈太子太保謚文肅遣官祭葬俱奉親極孝養事
伯兄甚謹以三品恩移廕兄子澄爲國子生歲出
所積穀賑贍族人遇鄉黨子弟有恩嘗購得楊氏別
業有世墓慰令勿徙缺其垣俾歲時往祀焉俱博學
高識爲文章雅健有法兼精吏事敏而能勤老雖居

重位而未值繁劇人以爲未盡其用云所著有思軒稿若干卷行於世子沂成化乙未進士累官至都察院右副都御史以才行世其家

徐溥

徐溥字時用號謙齋宜興人爲兒時已卓然成人少長從里師游嘗取經典法言爲一冊題曰聖賢要語藏夾袋中以自警里師疑爲玩具逼而觀之乃大驚因辭於其父漁隱先生曰吾不能爲令子師矣一日舅氏從外來稱他子弟善歌溥曰歌能顯親揚名乎若某所願則異於是人共器之景泰庚午鄉薦會試

不第歸益肆力於學至忘寢食寒暑遂成瘵疾甲戌
進士第二授翰林編修天順元年侍 東宮講讀成
化紀元遷左庶子充經筵講官纂修 英宗實錄陞

少詹事乙未主考會試陞太常寺兼學士擢禮部左
侍郎改吏部二十三年 孝宗登極簡入內閣總裁

憲宗實錄同知經筵弘治庚戌復典會試辛亥加
太子太傅武英殿大學士時岷藩訐奏知州劉遜詔
逮繫獄言官救之并遠群議洵溥力解免乙卯命
撰三清樂章溥率同官上言天子祭天地天至尊無
對故禮以少爲貴祭不過南郊時不過孟春牲不過

特牛漢祀五帝儒者非之况三清乃邪妄之說謂一天之上有三大帝乃以李聃居其一是以人鬼列於天神非理也至於郊祀樂章皇祖舊製今所傳樂章雖載永樂大典是書博采弗精不可以黷禮臣等誦習儒書若邪說俚曲尤所不習且初設文淵閣命學士居之者實欲其講議政事解論經史培養本源弼正闕失非欲其阿諛順旨以取容悅也 上從之丁巳總裁會典 武宗出閣加少師兼華蓋殿大學士溥在內閣承劉吉恣威福報私怨之後一以安靖處之中外咸義海內敎寧行政不必出於已惟其是

才華公傳卷二十一 三十一
用人不必由於已惟其賢時稱其有休休大臣之度
溥常希范仲淹置義田千畝以贍宗族 上嘉其義
特命捐其徭役邑人吳尚書友雲洪武初死事雲南
事久湮沒特致書守臣請賜贈謚祀享會以目肯致
仕歸一年卒壽七十有二訃聞 諭祭者九命有司
營葬事贈太師謚文靖

殷 貴

殷貴字南金號惺齋無錫人生有天下之慮每論治
必曰嚴明其諸區畫無巨細一於整肅見寬弛之俗
痛叱之不容口年十二入邑庠受經於水壑盛公學

日有進然累困場屋至四十二始膺貢卒業大學其
爲文雖時體必參古法曰不如是不能過人評品精
覈不隨人高下謁選授陽山知縣陽山隸廣之連州
古所謂天下最窮僻處也始至卽爲講律令俾知趨
避又大書爲善最樂四字印給之有兄弟爭田者反
覆開諭皆感泣去凡死囚必求生道不得已焚香告
天而後成獄獄中置一響板約曰冤未達者擊之有
所召集書片紙於門皆如期至數月間恩信旁達近
胥嚮而以勞感瘴竟不起病時吏民禱無虛日又走
百里求醫連州及其沒也罷市巷哭聲達於野處事

接物行以理遂止以理屈是非可否無少隱假與之
游者始若難合終則浹洽至數十年弗替

宋瑛

宋瑛字克輝華亭人弱不好弄稍長知嗜學攻苦窮
晝夜日食惟餽粥水豆人不能堪而瑛處之裕如旣
領鄉薦益肆志于學務窮天下之理究古今治亂興
亡之變期有以體之身心措諸事業天順丁丑廷試
第四人授工部主事繕工典徒役與中貴人雜處瑛
目絕于請屏豪猾求弊端所在而抉剔之憚其嚴而
樂其簡易然中貴人滋不悅思中傷之陰使人詐爲

儻以偵其過失歲餘無所得更得其廉謹數事加敬禮焉甲申引疾歸時年始四十五乃作延齡會以合族子弟願學者爲館穀教養之遠方來受業者甚衆事母至孝居喪哀毀有燕乳白雛于堂時人以爲孝感

白昂

白昂字廷議武進縣人天順丁丑進士授南京禮科給事歷應天府丞十二年陞南京大理寺右少卿十六年改北十八年陞南京右僉都御史二十三年陞南京兵部右侍郎弘治二年陞刑部左侍郎署掌都

察院事三年改戶部左侍郎治河原武四年陞掌院
事右僉都御史六年陞刑部尚書加太子太保 東
宮出閣進光祿大夫柱國太子太保初昂爲給事中
劾戶部尚書張鳳不法自南京逮至 詔獄已而釋
焉成化初邊警屢至 經筵少輟上言帝堯不以洪
水之災而輟明峻德太王不以昆夷之侵而殞厥問
聖德修則邊患息矣時黃霧之災又上言六事大
略謂 陛下卽位嘗詔罷貢獻矣而貢獻不絕常罷
織造矣而織造自如嘗禁權豪不得種鹽矣不得求
地矣京城內外不得創寺觀矣而皆不爲停止願守

大信勿以親倖而易其度其餘亦當世要務會監察御史謝文祥得罪率僚屬言文祥雖涉狂妄然其心則無他因而竄逐則忠良喪氣直士杜口恐非社稷之福丞應天興學校抑強植弱所定義役至今以爲式會劇寇劉通出沒海上東南騷然昂以都御史調士卒遠近皆會截其要路賊大窘廼宣布威信通挺身納款特於太倉學宮受之諭以禍福出於至誠通感泣廼縱之歸率其餘衆以降東南晏然復奏沿江要害守備等官互相應援遂爲定式河決金龍口將潰運道昂以河故道入渦者今不可復尋廼自陽

武封丘等處築長堤以防張秋之決又自中牟決口至尉氏縣下潁州經塗山仍歸鳳陽合淮入海築汴堤高卑廣狹樹之萬柳以固之又於宿州濬古睢河入運河以分徐州之勢築蕭縣徐集等口以殺汴徐之勢又堤運河自魚臺至德州自德至吳橋復修古河堤東平至興濟作減水河一十二道大清河及古黃河以入海每河口作石堰盈則泄縮則潛以濟運河由是河漸復故道漕運無虞高郵湖善覆舟乃議開複湖於東岸以避其患亘四十餘里時議者多不便昂執之堅至於今舟行往來免風濤之患人名曰

白公堤其在都察院凡御史出巡必令巡訪所屬廉
污勤惰才鄙狀以報因以所報真僞爲御史升黜又
言方今天下衛所士卒十去有五所司侵牟弊孔百
出宜預覈尺籍定數使較然畫一案籍搜考庶絕詰
擾欺遜之弊又言天下奏報災荒多不實或以荒爲
稔以稔爲荒其弊實多宜令御史覈實天下田數高
下之則藏之官旱則蠲高水則蠲低庶夙弊可絕咸
納焉其在刑部一以矜恤爲心嘗自誦曰君子之心
公而恕又曰秋霜之肅何如春陽之溫故凡情可矜
疑者多得平反御史李興以詰暴處死無敢言者昂

曰不可使 朝廷有殺諫官之名廼率衆大臣上言
典固可罪然律有致死之罪使典而處死則故勘故
殺者又將何以加之典得免死嘗患條例繁多吏得
下上爲奸廼芟復釐厯定爲若干條奏頒之內外官
司守以爲法於是法令始一矣昂立 朝不爲危行
議論每依於忠厚善哀高益卑因事爲功平居恂恂
若無能臨事決機應變無所疑滯不爲崖岸表襮上
自王公貴人下至輿皂無不得其歡心已未以病告
允進太子太傅馳驛以歸月給俸以優老旣歸園亭
賓客極一日之盛繪圖賦詩以傳癸亥卒年六十有

九贈太保謚康敏昂雖位極公孤而左右無媵妾於
孝友尤篤少時繼母王夫人有疾每夕稽顙北辰既
而果瘥念弟昇蚤逝恤其二孤訓迪備至近三品以
上得蔭子入太學舍其子而與姪人尤難之在兵部
時推范文正公遺意置田若干畝以贍其族貧者或
給之耕具立義學二一集族之稚爲正字畫句讀一
集其秀者授之舉業又立祭田若干歲時三祭自始
祖以下咸預祭畢讌長幼又設藥局儲善藥鄉之疾
病者多歸焉

秦 夔

秦夔字廷韶號中齋無錫人登天順庚辰進士拜南京兵部主事進員外郎中奏革隸卒之冗者以杜請託成化壬辰出爲武昌知府武昌地大政繁而夔一意愛民如恐不及除奸惡植良善課農積穀創養濟院定均徭法嘗至江潯見一婦反接投沙中詰之乃盜所劫欲污之而不從故投之于此卽收置屏處跡得盜寘于法而還其婦于夫優人李昆寓長沙見陸氏女美而多貲百計求得以爲室其族兄赴愬于夔乃按正其罪女歸陸氏當是時湖南治行無如秦守者會以憂去凡贖鍰羨餘一切勿問服除補建昌府

時廣昌何氏得罪于令竟置于極典而陰令人證之
庭讞之際何氏稱冤夔乃逮證者詰之曰爾厚誣平
人知非本意然異日罪將歸爾其人流涕吐實何遂
免死自幼嗜學徧覽羣書下筆累數百言詩清麗有
則字法道逸故所至每考求遺蹟在武昌新張乖崖
祠復李太白曾南豐祠皆措處有法役弗及民遇山
川佳勝處登臨懷古形之賦咏尤多乙巳擢福建右
叅政晉江西右布政使遂以疾致仕作五峰草堂天
全亭於九龍山下日吟咏其中以六十三歲而卒有
中齋集藏于家

沈暉

沈暉字時暘宜興人天順庚辰進士授南戶部主事陞員外郎中成化戊戌改南禮部尋陞陝西布政司叅議以憂去服闋除福建未幾進左叅政弘治庚戌陞廣西右布政衛士以缺糧相煽爲亂暉捕得首惡三人斬之遂定明年轉江西左布政甲寅陞右副都御史撫治鄖陽下令許民之無田者得耕廢棄地免其租三年歲餘得常稔田數千頃又甓鄖陽城十有二里於襄樊往來要津造浮梁八十艘以便涉者民甚德之未幾改巡撫湖廣時武岡州知州劉遜坐裁

抑藩府被誣暉爲直之戊午召爲南工部右侍郎踰年以言官論劾力求去家居數載而卒賜祭葬如例暉敏歷中外幾四十年頗不失職其爲侍郎較工計直細及錙銖人多怨之用是屢招浮議然暉旣去繼者閱牘咸以暉所執爲是云

陸簡

陸簡字廉伯武進人成化元年鄉貢第一二年進士及第授翰林編修預修英廟實錄加俸一級秩滿陞侍讀以續修通鑑綱目成陞右春坊右諭德上在東宮時侍講讀丁父憂服闋弘治元年召修憲

廟實錄至則以舊勞陞右庶子兼侍讀充經筵講官尋直日講實錄成陞詹事府少詹兼侍講學士七年以日講勞特陞詹事兼侍讀學士踰年卒年五十四賜祭葬贈禮部右侍郎簡姿貌秀偉少有俊才頗不自檢制晚益矜持自負當遠到既久滯不顯亦多鬱抑齋志以沒爲詩文峻潔有法不輕應接喜談節義嘗念宋刺史姚訔等九人死難言于有司立忠義祠祀之其自曾祖以下俱襲金姓簡始復姓陸子與章亦舉進士

華山

華山字仁甫別號靜菴無錫人登成化乙未高第知許州遷南京兵部武選員外郎再遷職方郎中改刑部擢湖廣右叅議奉勅提督太和山諸宮觀居二年乃自請致仕以歸是爲正德丁卯又五年壬申以疾卒年六十有六山忠朴謙厚與人恂恂至於執節稟義則抗直不少貶損初在許有王僉事墳之子司馬馬公壻也犯法當死董僉事齡欲曲全之山入分司庭辯至免冠顙天頓首不已董媿謝卒抵于法鈞鄰于許徽藩國焉許有奸民兩以地往獻凡若干頃山執不予董長史彞見許濠有荷華之觀肆言欲請之

山曰是不可以言爭卽日令決其水荷乃不華民免於擾臨賴民史經左誘其尹指盜誣人尹故爲執政者友監司庇焉因減史罪山請附誣告致死人律上下稱允其在兵部先爲武選後以職方郎中攝其事稽世閱人遷代紀襲惟覈以法不少徇其在湖廣尤著介特襄陽民馮成以罪減死當戍邊久訟避遣山立遣之蔓逮者如獲安業道士有怙勢冒領牒踰禮部數者立置之法鄖陽饑廩無以賑爲發襄陽粟賑之或以擅告不聽房山爲流民藪新作縣治而未城山曰非備也亟請城之其他事類是者尚多不悉紀

白 玠

白玠字宗璞武進人生而聰敏少喪父母落落無所依遂挾書往金陵之句曲山寄跡華陽館從黃冠游忽感悟自奮乃之京師學於翰林編修徐先生之門久之大有所得補府庠博士弟子員益刻厲問學竟領成化戊子鄉試明年試禮部賜進士尋授戶部主事主納通州軍儲以勞疾告歸抵家踰年復起主納內庫銀絹壬辰給賞遼東邊軍往時銀積羨餘所司多侵匿玠悉歸之官癸巳勘理浙江諸路鹽鈔時權貴私販累數十萬商人大沮極力裁革人稱便焉比

還陞本司員外郎甲午夏持節充副使往湖襄封王
賜予悉辭不受陞陝西司郎中癸卯朝廷以運舟稽
緩命催督首責綱運之爲奸弊者其徒歛避事賴以
濟山陝歉荒人相食議舉納粟之令他如僧道度牒
生員入監各以差入銀實官帑其所出納皆玠主之
人稱廉明未幾有南京尚寶之命體素瘠而才識豐
瞻遇事立辦談議風生故爲時所推許性孝友自傷
蚤失怙恃因名其讀書之軒曰思親示終慕之意事
諸兄敬愛處友和易持身謹愆人未嘗見其過嘗買
婢見其有戚容問之知其官人女也養以爲女擇良

士配之兄姊老分俸以贍其行義多類此旣進列卿
復得南畿密邇鄉邑乃於興仁之第築圃鑿池種竹
構小軒三楹榜曰隔塵且曰吾得釋去繁劇將營菟
裘老焉未幾而卒得年五十有七而已有遠行稿思
親軒稿若干卷藏於家

王沂

王沂字希曾直隸武進人南吏部尚書與之子成化
十一年進士授禮部主事歷陞員外郎郎中山東右
叅政湖廣右布政丁文憂服闋轉山東左布政使弘
治十四年陞右副都御史巡撫真定等府兼提督紫

荆三關累疏乞休不允卒于官年六十二訃聞賜祭
葬如例給驛歸其喪沂嚴毅謹恪天性孝友在禮部
時外國以獅子來貢希重賞又有貢刀劍數至三萬
者沂言夷人貪詐無厭量損其賜直且定數著爲例

憲廟上賓凡

山陵

廟祧遷祔之議儀文草創

多所考據及巡撫時賦役繁重力爲裁省滹沱河水
溢壞民田廬奏請築堤捍之功成賜綺幣獎勞沂方
髫時母吳溺于北河每舟過溺處大慟幾絕生平自
處儉約家雖富無貴侈態居官二十餘年終始一致
人以爲有父風云

張愷

張愷字元之號東洛無錫人成化甲辰進士授兵部主事守山海關任滿改刑部員外謫順德判歷東平知州黎平府知府落職家居用言官薦起知太原府轉福建鹽運司使致仕歸年八十有六而卒爲人狷介自植於不潔一無所屑居官所至公廉執法不肯小有所屈其在山海關關故藉錢于旅人以給官用愷移檄永平府使量出關帑代其費至今便之歷順德黎平東平皆有惠利在民務先禮教而後誅罰其自東平徙黎平也東平人至涕泣遮道不忍其去平

生不受人一介人亦不敢以一介溷爲進士赴選邑令贖以二十金謝却之其後爲運使罷歸諸賈人致羨餘九百金拒勿納也獨在東平時受一帶于郡人太守張鄜鄜重義人也年九十餘矣未嘗干謁有司愷去東平鄜率子弟出餞且贈以兩帶辭不獲而受其一郡人至相語曰惟侯能致鄜出惟鄜能致侯受蓋兩相重云其在黎平獠民竄伏谿峒間頑獷不可羈縻而府治寓湖廣五開衛城諸獠入辦稅錢衛捕率爲攫取不敢入以是多逋課又舊設撫苗官苞苴贖貨大爲苗害愷力請罷之又移文湖廣諸司戢其

官軍由是始出入城郭無所苦而稅錢得完諸苗有
仇殺積十餘年不解者與刻日爲盟遂解去自是聲
著蠻中然雖以廉幹強直爲上下所快而亦以此取
嫉于人其自刑曹而出順德也會中官羅織諸曹或
謂愷居曹未久可自白愷曰諸曹皆無辜我何用獨
免爲在黎平上官以不時謁爲咎然竟不往因力請
謝病而又值闕瑾怒罰米而奪之官硜硜不少貶而
世亦遂不能容乃其忠信著乎其官靖節乎乎其鄉
則雖嫉之者固亦不得而掩也所著有蠙竅餘音若
千卷藏于家

邵寶

邵寶字國賢無錫縣人成化甲辰進士授許州知州能以禮讓爲國作新廟學諭諸生義利公私之辨及忠孝大節聞者感動次教之讀書爲文矩則文風蔚然改觀正穎考叔祠墓改魏文帝廟以祀漢愍帝祀范忠宣公於襄城裴晉公於郟城毀龍骨杖妖巫尤急民事躬課農種做朱文公社倉立積散法行計口給田法爲備荒計釐正糧籍民至於今稱便弘治七年徵爲戶部員外郎尚書周文端劉忠宣甚器重之十年進郎中操履清潔不可干以私政暇錄戶部條

例并各荒儉數目備記不遺而卹民隱惜財用 朝
省諮議多采之十三年推陞江西提學副使至則以
身爲教先行檢而後辭藝黜浮崇雅士類勃興修濂
溪書院清學田定課程遠近向慕十八年陞浙江按
察使正德二年陞浙江右布政使三年陞湖廣左布
政使鎮靜簡重足以革浮靡消澆訕而聲望益隆四
年陞都察院左副都御史總督漕運時劉瑾用事一
無所通瑾銜之數以危言憾屹不爲動乃令致仕去
瑾誅起巡撫貴州未任改戶部左侍郎疏乞終養十
四年起南京禮部尚書以終養辭十六年言官交薦

再起本部尚書疏懇辭 上褒以溫旨不奪其志寶
性度端雅貞介夙成然未嘗疾言遽色人或數百語
不能終徐以數語卽竟之常曰願爲真士夫不願爲
假道學於聲色貨利嬉戲事絕口不言惟達人君子
前輩舊德則敬之久而弗衰一時儒碩並以天下士
稱之卒贈太子少保謚文莊所著學史簡端錄二書
巡撫吳廷舉上於朝又有容春堂集若干卷

白圻

白圻字輔之武進人年十八占應天鄉試明年登進
士授南京戶部主事進刑部員外郎郎中改戶部督

漕運以憂去改都水郎中陞浙江叅議時逆瑾柄政有承風旨開處州銀穴者圻曰不可目前之利小意外之變大乃以贖金充內帑事得已鄞有少年爲日本館甥已乃隨使人貢鄞人執之以問夷人大噪圻曰夷狄不可以中國之治治少年者予之無損治體奪之或啟釁端縱之逸長興有田嚙於水凡八十頃而糧固在民甚病之爲奏免轉福建叅政汀漳盜起輿疾率兵至大田驛相拒二十餘日會鎮東官軍至合擊之賊乃解散進山東左布政使遷尹應天遂擢都察院右副都御史提督南京糧儲應天圻父康敏

公舊治也大興學校招復流移修舉康敏舊政上便
宜七事皆切時宜京儲歲入一百二十七萬所出乃
一百五十餘萬石圻奏南京根本重地儲蓄減耗所
出多於所入何以持久請革冗費冗食劾武臣逋負
不法坐辜者若干人會聞母訃奔喪歸旋得疾卒事
聞賜葬祭年五十有三圻性明爽樂於興事而議論
每依忠厚於故人子弟及貧弱調護周至盖有康敏
之風焉至案致樂清徐把總之罪平反安吉知縣廖
紀之寃窮竟倅干茂之賊而雪副使張巽之洿鱣寬
恤山東流賊殘破州縣檢奏守志不汙者表章之所

在賑飢恤災尤爲人所稱道云

吳儼

吳儼字克溫宜興人成化丁未進士選翰林院庶吉士巳酉授編修丙辰同考禮部試又克經筵講官兼司經局校書庚申陞左春坊左中允辛酉轉南京翰林院侍講學士正德丙寅召還纂修孝廟實錄充經筵日講官兼修玉牒丁卯主考應天鄉試時逆瑾恃寵傾陷正直第二場以爲臣不易命題瑾心已惡之又聞儼家巨富陰遣人啗以美官儼峻拒之瑾益慙怒媒孽無所得會朝覲考覈外官以不根之語罷

之瑾誅起用仍舊職未幾擢南京禮部右侍郎壬申
召還禮部乙亥轉左侍郎持節冊封益府丙子陞南
京禮部尚書丁丑武宗北幸宣大偕府部大臣上
疏切諫以正德十四年五月卒于位訃聞賜葬祭謚
文肅儼性方嚴操履清慎當官臨事期於自立秉經
議禮多合古意爲文章莊重簡古詩詞清麗可諷

華津

華津字濟之號審齋無錫人成化丁未登進士第授
湖廣松滋縣知縣操勵自引庶政斬斬時有奸人挾
王府勢強取於民執而法之江溢壞民廬居爲之堤

埠民賴以安滿三年撫按旌異政遂以風憲召聞母疾取道歸省比至陞刑部主事在刑部遇疑獄反覆叅鞫盡求生之道決囚淮揚諸郡平反爲多屬有疾請告歸遭父喪起復改戶部主事出納惟謹嘗監通州倉有怙中監勢請事者拒之固中監銜之尚書顧公虞其中傷也亟調監七馬房倉其嚴猶通州三年署員外郎奉勅勘田湖廣常德時奸瑾扇虐旣行而有後命遣人追與之牒至則已由水道還矣其人旣還報而津始至衆危之瑾見於左順門顧而謂曰華先生汝來何遲也蓋亟往事事乎竟無他言未幾署

郎中二年陞湖廣辰州知州遭母喪起復補廣平府
時當兵荒畢精經畫凡無益之費不急之務悉罷之
又請蠲常賦外民不能共者數事惟學校所須不以
乏省太僕丞有欲收養馬民免地稅錢十之五者津
曰民累于馬甚矣以若所免猶不紓困如征其半民
何以堪遂以其事白巡撫都御史轉聞于 朝悉復
其故屬邑邯鄲城每山水秋至輒壞民病修築津曰
山水挾西河橫流舍河而他圖雖勞無庸乃改河上
流北注之漳水勢旣分城乃無墊責戚并民田於清
河征歛太橫民訴於朝事下之日削其數什九民咸

歸德尋陞河南副使分守河東道搜剔利弊罷行惟
允發私賄以正官邪禁戢豪強視廣平尤力居二年
上疏乞休不許會車駕西幸境內一切供應之事夙
夜調度者三月繼聞再幸之報巡撫都御史偕津至
代殫力繕備又越二月疾作返臥司廨月餘遂卒年
六十一

薛格

薛格字平甫江陰人少穎悟經史過目不忘弱冠領
成化庚子鄉薦累試不第益肆力于學中弘治癸丑
進士選翰林庶吉士三年授檢討念父年高不得就

養乃疏乞歸省居無何遭疾卒年纔四十有四選庶
吉士時內閣考題爲中秋無月中一聯云關山有調
空聞笛烏鵲無聲倦倚樓館中諸老共相嘆賞以爲
必傳惜其文之不全也